

Ilinniartut ineqarfii pillugit Namminersornerullutik Oqartussat nalunaarutaat

Inissianik attartortitsisarneq pillugu inatsisartut peqqussutaanni nr. 2-mi, 12 maj 2005-imeersumi § 3, imm. 3 naapertorlugu inissianik attartortitsisarneq pillugu inatsisartut peqqussutaanni nr. 14, 20. november 2006-imi allannngortinneqartumi aalajangersarneqarpoq:

Kapitali 1

Atuuffissaa

§ 1. Nalunaarut Namminersornerullutik Oqartussat ilinniartunut ineqarfutaannik attartornermut atuuppoq.

Imm. 2. Ilinniartut ineqarfii imm. 1-imi pineqartut tassaapput inissiat Namminersornerullutik Oqartussanit ilinniagaqartunut ilinniarnerminni inissaattut atugassanngortinneqartut.

Kapitali 2

Ilinniartunut inissiamik qinnuteqartarneq

§ 2. Ilinniarniarlutik qinnuteqartut, Suliffeqarnermut Inuussutissarsiutinullu Ilinniartitaanernut Pisortaqarfup ilinniarfisa akuerineqartut ilaannut ilinniagaqalernissamik akuerineqarsimasut, ilinniagassarlu akuerisaasoq tunngavigalugu ilinniagaqarnersiuteqarnissamik pisinnaatitaaffiliisuni ilinnialersinnaasunut, allaganngorlugu ilinniagaqartut ineqarfisa aqutsisoqarfiannut inissamik atugassinneqarnissamik qinnuteqartoqarsinnaavoq, Namminersornerullutillu oqartussat ukiut ataasiakkaalugit ilinniartunut inissiamik atugassiisarpaq.

Imm. 2. Ilinniagaqartut inissiaataannik aqutsisoqarfup inissianik attartortitsisarneq imatut tulleriinnilimmik ingerlatissavaa:

- 1) Ilinniartunut avataaneersunut ilinniarfimmu illoqarfimmi allami imaluunniit ilinniartup nammineq angerlarsimaffittut illoqarfiginngisaani nunaqarfiginngisaaniluunniit pisumut akuerineqarsimasunut, imaluunniit ilinniagaqartunut avataaneersunut inuussutissarsiutinut ilinniartitaanermi ilinniagaqalertussanut, sungiusaammillu suliffeqartussanut, Kalaallit Nunaanni illoqarfimmi allami ingerlanneqarsinnaanngitsunut, taamaattorli immikkoortut 2-anni allassimasut naapertorlugit.
- 2) Ilinniartunut avataaneersunut ilinniagaqartunut inissianut salliutinneqartussanut, ilinniagaqalerniarloq ilinniagariligassaminut tiguneqareersimagaangat, ilinniagaqartunullu inissiaateqartoqartillugu.
- 3) Ilinniartunut avataaneersunut lærlingit ilinniagaqalernissamut isumaqatigiisumik atsiugaqarsimasunut, ilinniagaqarnissamut sungiusaammilluunniit sulinissamut ingerlatsivimmut suliffeqarfimmulluunniit isumaqatigiissuteqarsimasunut ingerlatsiviup suliffeqarflluunniit ilinniagaqartumut nammineerluni inissaqatitsisimangippat, ilinniartunullu inissianik atunngitsorparpat.

Qinnuteqarneq ingerlatsivimmut suliffeqarfimmilluunniit isumagineqassaaq, lærlingitullu ilinniagaqarnissamut isumaqatigiissut, ilinniagaqalernissamik isumaqatigiissut sungiusaammilluunniit sulinissamik isumaqatigiissut ilanngunneqassalluni.

4) Ilinniartunut gymnasiami ilinniagaqarnissamut tiguneqarsimasunut, imaluunniit inuussutissarsiutitaarniarluni ilinniagaqalernissamut akuerisaasimasunut, aammalu ilinniagaqartunut sungiusaammik suliffeqarlernissamut Kalaallit Nunaanni illoqarfimmi allami akuerisaasimasunut.

5) Ilinniagaqartunut ingerlaqqiffiusumik ilinniagaqarnissamut tiguneqarsimasunut.

Imm. 3. Ilinniagaqartut ineqarfisa allattoqarfiat immikkut illuinnartutigut, minnerunngitumillu isumaginninnikkut pissutsinik tunngaveqartumik, inissaqartitsinikkullu periarfissaqartillugu ilinniagaqartut imm. 2-mi, imm. 1-3-mi immikkoortorlu 4 naapertorlugu piffissami killilikkami ilinniagaqartunut inissiamik atugassiisinnaavoq.

Imm. 4. Ilinniagaqartoq avataaneersutut isigineqassaaq, imm. 2-mi nr. 1-3 naapertorlugit, ilinniagaqartoq minnerpaamik ilinniagaqarnerup aallartinnginnerani ukiuni marlunni ataavartumik illoqarfiup ilinniagaqarfigisassap avataani najugaqarsimaguni.

Imm. 5. Ilinniartut meeraat, aappaat inooqataalluunniit ilinniagaqarnersiutit pillugit nalunaarut naapertorlugu akiliunneqarlutik angalasinnaatitaasut inissaqartillugu ilinniartoq peqatigalugu ilinniartut ineqarfianni ineqartinneqarsinnaapput. Inooqatigiinnut sivikinnerpaamik ukiumi ataatsimi inooqatigiissimaneq uppersaasiunneqassaaq. Ilinniartup meera, aappaa inooqataaluunniit nalunaaruteqaqqaarani ilagineqartut ilinniartut ineqarfianni najugaqartinneqarsinnaanngillat. Meeqqat 18-it sinnerlugit ukiullit nassarneqarsinnaatitaanngillat.

Imm. 6. Ilinniartut sulisunut inissiamik tunineqarsinnaasunik aappaqartut inooqateqartulluunniit ilinniartut ineqarfiini inissamik tunineqarsinnaatitaanngillat imaluunniit taamaattumi najugaqaannarsinnaatitaanatik.

§ 3. Ilinniagaqartunut inissiaritinneqartuni inissiamik tunniussisarnermi piumasaqaataavoq ilinniagaqartup ilinniarnerninik ingerlatsinera aammalu Kalaallit Nunaannut attaveqavissuunera, Namminersornerullutik Oqartussat ilinniagaqarnersiuteqarneq pillugu nalunaarutaat naapertorlugu.

Imm. 2. Ilinniartut ineqarfisa allaffeqarfiat imm. 1-mi pineqartoq naammassineqarsimanngippat ilinniagaqarfiup inassuteqarnera tunngavigalugu ilinniagaqartup inissiamik tigumminniinnarnissaa akuerigallarsinnaavaa, qaammatit 4 angullugit sivilussuseqartumik, tamanna immikkut ittunik pissutissaqartinneqarpat, tassunga ilanngullugu assersuutigalugu ilinniagaqartoq kursusernissamut peqataaniarluni nalunaarsimappat, ilinniagaqarfigisaminulluunniit isumaqatigiissuteqarsimappat ilinniarnermut atasumik nalunaarusiornissamik, minnerpaamik ukiup ilinniartusup affaanik sivilussuseqartumik 30 ETC-points-itunut nallersuunneqarsinnaasumik.

Kapitali 3

Ilinniagaqartunut inissiaatinik aqutsineq

§ 4. Namminersornerullutik Oqartussat ilinniartunut inissiaataat naatsorsusernermi immikkoortunut inissinneqassapput, taamaalluni inissiaqarfik ataatsimoortoq ataaseq, inissiaqatigiit ataatsimoortut aallaavigalugit aqukkuminartunngorlugit, taamaattoq imm. 2 naapertorlugit.

Imm. 2. Nuummi ilinniartut ineqarfii ilinniartut ineqarfisa allaffeqarfiannit ataatsimut allaffissornikkut aqunneqarput, Ilinniarnertuunngorniartullu ilinniartunut inissiaatai pinnagit. Ilinniartut ineqarfisa sinneri ilinniartunut inissiaatit aqutsiviannit ineqarfiup aqutsuinit toqqarneqartunit aqunneqassapput.

Ilinniartut ineqarfiisa allaffeqarfiat tassaasinnaavoq ilinniarfimmi ilinniagaqartut atuarfigisaanni pisortat sulisulluunniit.

§ 5. Ilinniartut ineqarfiisa allaffeqarfiat ineqarfiup ulluinnarni ingerlanneqarnerani isumaginnittuussapput, nalunaarummi uani aalajangersakkat ineqarfiullu malittarisassai naapertorlugit.

Imm. 2. Ilinniagaqartut ineqarfiannik aqutsisut akisussaassuseqartumik ineqarfiup aquunneqarnissaa nakkutigissavaat. Ingerlatsineq allaffissornikkut pisariillisakkamik ingerlanneqassaaq, aqutsinermilu aningaasartuutit appasinnerpaaffissaminiitinneqassallutik.

Imm. 3. Allaffissornikkut aqutsinermi najugaqartut soqutigisaat pitsaanerpaamik isumagineqassapput, ineqarfiullu suliassaatai pitsaanerpaamik ingerlanneqassallutik.

§ 6. Ilinniagaqartut inissiaannik aqutsiviit tamarmik ineqarfiup malittarisassaanik aalajangersaassapput.

Imm. 2. Ilinniagaqartut inissiaannik aqutsiviup ilinniagaqartut inissiaanni ileqqurissaarnissamut malittarisassat suliarissavaat, atortussanngortinneqartussat najugaqartunut saqqummiunneqareerunik. Ileqqurissaarnissamut malittarisassat tassaasinnaapput eqqiaasarneq, ataatsimiinnissani aggettussaataitaneq, imigassanik aalakoornartortalinnik atuineq, nipiliorneq, pulaartoqarsinnaatitaaneq allallu.

§ 7. Ilinniartut ineqarfiisa allaffeqarfiata missingersuusionermi ilitersuutit qaqugukkulluunniit atuuttut kiisalu Namminersornerullutik Oqartussanut naatsorsuuserinermut naatsorsuusionermullu malittarisassat qaqugukkulluunniit atuuttut malissavaat.

§ 8. Ilinniartut ineqarfiisa allaffeqarfiata iluminni atuuttussamik utaqqisut allassimaffianik suliaqarsinnaapput, najugaqartut qanoq sivilutigisumik najugaqarsimanerat naapertorlugu inissamillu pisariaqartitsinerat naapertorlugu tulleriiaarneqartumik.

§ 9. Ilinniartut ineqarfiisa allaffeqarfiat akisussaavoq attartortitsinermi attartornermillu taamaatitsisarnermik isumaginninnerup nalunaarummi aalajangersarneqarsimasut naapertorlugit ingerlanneqarnerannut.

Kapitali 4

Najugaqartut siunnersuisoqatigiivi

§ 10. Ilinniartut ineqarfiini tamani najugaqartut siunnersuisoqatigiivini pilersitsisoqarsinnaavoq makkunanga suliaqartussanik:

- 1) najugaqartut akornanni ulluinnarni suliassat aaqqissuunneqarnissaannik agguataarneqarnissaannillu suliaqartussanik,
- 2) ilinniartut ineqarfianni najugaqartut ulluinnarni toqqissisimasumik atugaqartinneqarnissaannik qularnaarisussanik.
- 3) ilinniagaqartut ineqarfiata torersuunissaanik isumaginnittunik, kiisalu
- 4) ineqarfiup paarineqarnerata aserfallatsaalineqarneratalu nakkutigineqarneranik isumaginnittunik.

Imm. 2. Ingerlatseriaatsip najugaqartut ilinniartut ineqarfiannik ulluinnarni ingerlatsinermut sunneeataasinnaaneranik tunngaveqarnissaa, kiisalu najugaqartut 18-it inorlugit ukiullit inersimasumit nakkutigineqarnissaasa qularnaarneqarnissaat isumagineqassaaq.

Imm. 3. Najugaqartut siunnersuisoqatigiivi suleriaatsimut maleruagassami suliassat pillugit ersarinnerusumik allaaserinnissinnaapput.

§ 11. Najugaqartut siunnersuisoqatigiivinut ilaasortaaneq akissarsiaqaataanngilaq.

Imm. 2. Taamaattoarli siunnersuisoqatigiit sulinerannut atatillugu ilinniartut ineqarfiisa allaffeqarfiat

anigaasartuuteqalaarsinnaavoq soorlu allakkanik nassitsinermut, kopeerinermit aammalu allattuinermit atorussanut siunnersuisoqatigiit sulineranni atornerqartussanut, soorluttaaq ilinniagaqartunut inissiatinik aqutsinermit ilaannakuusumik tamakkiisumilluunnit akissarsialiisoqarsinnaasoq, soorlu aserfallatsaaliinermut minnerusunut.

Kapitali 5

Attartornermut isumaqatigiissut, akiliuteqartarnek qularnaveeqqusiinerlu

§ 12. Inissiamik attartorneq pillugu isumaqatigiissut kalaallisut danskisullu allaganngorlugu suliarineqarsimassaaq, ilinniartitaanermullu Pisortaqarfimmit akuerisaassalluni. Ineqarnermut akiliut attartorneq pillugu isumaqatigiissummi allassimassaaq. Ilinniartut ineqarfianni najugalik kingusinnerpaamik iserternerminut atatillugu attartorneq pillugu isumaqatigiissummik, aamma pisattat nalunaarsornerannut takussutissartalimmik atsiussaaq.

Imm. 2. Ilinniartut ineqarfianni najugalik kingusinnerpaamik attartorneq pillugu isumaqatigiissummik atsiornermut atatillugu ilinniartut ineqarfianni maleruagassanik ilinniartullu ineqarfianni torersaarnissamut malittarisassanik tunineqassaaq.

Imm. 3. Attartorneq pillugu isumaqatigiissummi aalajangersakkat ilinniartut ineqarfianni najugaqartumut annerusunik pisussaaffiliisut nalunaarummiluunniit taaneqartunit ikinnerusunik pisinnaatitaaffeqartitsisut isumaqatigiissummi erseqqissaatigineqassapput.

§ 13. Attartornermut isumaqatigiissuteqarnermit ilinniagaqartut inissiaanni ineqartussap ineqarnermut siumut akiliutissaq qaammammi ataatsimi attartornermut akiliutip nalinga najugaqartup ineqarfigisaminit nuunnissaani pisussaaffigisinnaassanut sillimmatitut akilertassavaa.

§ 14. Ineqarnermut akiliut anigaasanut inatsimmi aalajangersarneqartarpoq.

§ 15. Ilinniagaqartunut inissiami najugaqartup najugaqarnermut isumaqatigiissummi piffissaliussaasoq naapertorlugu akiliutissani akilertassavaa, taamaattoq imm. 4 naapertorlugu.

Imm. 2. Akiliuteqarnissaq kingusinnerpaamik akiliiffissarititaasumiit ulluinnaat 3 qaangiunneranni isumagineqassaaq. Ulloq taanna arfininngorneruppat imaluunniit inuiattut ullorsiortarfiuppat, ulloq akiliiffissaq kingulleq tassaassaaq ulluinnaq siulleq.

Imm. 3. Ilinniartut ineqarfianni najugalik piffissami attartorneq pillugu isumaqatigiissummi aalajangersarneqartumi attartornermut akiliissaaq, taamaattoq imm. 4 takuuk. Akiliiffissamik innersuussisoqarsimanngippat ineqarnermut akiliutissaq ilinniagaqartut ineqarfiisa allaffeqarfianni akilernerqassaaq. Anigaaserivimmi allakkerivimmiluunniit akiliineq akiliiffissami akiliinertut isigineqassaaq.

Imm. 4. Ilinniagaqartut ineqarfianni najugaqartoq ilinniagaqarnersiuteqartuuppat, ilinniagaqartut ineqarfiisa allaffeqarfiata ineqarnermut akiliutissaq ilinniargaqarnersiutissiassanit ilanngaatisinnaavaa, ilinniagaqarnersiuteqarneq pillugu peqqussummi § 24 naapertorlugu.

§ 16. §§-it 12,13, aamma 15 saneqqunneqarsinnaanngillat ilinniagaqartut ineqarfianni najugaqartumut ajoqutaasumik.

Kapitali 6

Aserfallatsaaliineq iluarsaanerlu

§ 17. Ilinniartut ineqarfiisa allaffeqarfiata ilinniartut ineqarfini inissiaq attartornerup aallartiffissaatut isumaqatigiissutaasumit ilinniartut ineqarfianni najugaqartumut pitsaasumik illersorneqarsinnaasumillu

isumagineqarsimasoq atugassanngortissavaat. Illersorneqarsinnaasumik isumagineqarsimasoq isumaqarpoq ilinniartumut inissiaq peqqinnissamut uloriarnartuussanngitsoq, soorluli aamma assersuutigalugu natsermi putoqassanani. Ilinniartulli ineqarfianni najugaqartup nuunnerminut atatillugu ilinniartut ineqarfianni allaffissornikkut aqutsisut immikkut aserfallatsaaliinermik assersuutigalugu nutaamik qalipaasoqarsimanissaanik piumasaqarsinnaanngilaq.

Imm. 2. Ilinniartumut inissiaq iserterfigineqarnermini:

1) nalinginnaasumik aserfallatsaalineqarsimassaaq, imatut paasillugu qilaaq iikkallu

qalipanneqarsimassasut, natserlu qisuusoq lakkerneqarsimalluni, kiisalu

2) uumasuaqassanani, igalaat ilivitsuussallutik, skaviit matui, matut, parnaarsartut, teknikikkullu atortorisarutit ajoquteqassanatik.

Imm. 3. Ilinniagaqartut ineqarfianni najugaqartussaq iserternerminut atasumik minnerpaamik ilinniartut ineqarfiannut matuersaatinik 2-nik tunineqassaaq.

Imm. 4. Ilinniartut ineqarfiat najugarineqartussaq attartulernerup aallartinnerani amigaateqarpat ilinniartut ineqarfianni najugaqartup amigaatigineqartunik pisinnaatitaanini annaajumanagu kingusinnerpaamik attartulernermit ullut 14-nit qaangiuppata ilinniartut allaffeqarfiannut nalunaassaaq pineqartut piumallugit. Amigaatilli nalinginnaasumik misissuinermit takuneqarsinnaasimangippata imaluunniit attartortitsisoq peqquserlussimappat tamanna atuutissanngilaq.

Imm. 5. Ilinniagaqartut ineqarfianni allaffissornikkut aqutsisut ineqartoq amigaataasunik isumaginnittussanngortissinnaanngilaat, ineqartup aqutsisunut kingusinnerpaamik iserternermiit ullut 14-it qaangiunneranni uparuareersimasai.

§ 18. Ilinniartut ineqarfianni sumiiffiit ataatsimoorussat isumannaatsumik aserfallatsaaliorneqarnissaat ilinniartut ineqarfiisa allaffeqarfiata isumagissallugu pisussaaffigaat.

Imm. 2. Avammut kuuffinnut, kiassarnermut, innaallagissamut, gassimut imermullu teknikikkut atortulersuutit tamarmik pitsaasuutinneqassapput atorsinnaasuutinneqassallutillu. Taamatuttaaq innaallagissamut ikkuffiit, matserfiit, kiassaatiit, ruujorit, sikaaviit aalaakkaasut, illup iluani atortut il.il. aserfallatsaalissallugit ilinniartut ineqarfiisa allaffeqarfiata pisussaaffigai. Nungullarnikut pisoqalisullu ima akulikitsigisumik ilinniartut ineqarfiisa allaffeqarfiannit isumagineqartassapput ilinniartut tassanilu najugaqartut eqqarsaatigalugit pisariaqartitsinerit malillugit.

§ 19. Piffissami attartorfusumi ilinniartut ineqarfianni najugallip attartukkami qilaat qalipallugit qaqorsarnissaat, iikkat qalipannissaat aamma/imaluunniit tapiitilersornissaat kiisalu natit lakkernissaat akisussaaffigaa. Taamatuttaaq piffissami attartorfusumi ilinniartut ineqarfianni najugallip matuersaaserfiit matuersaatillu pisariaqartinneqarpat aserfallatsaalillugillu nutartertassavai.

§ 20. Ilinniartut ineqarfianni najugarisaq iserternermi eqqiarneqarsimangippat attartornerullu nalaani pitsaasuunanilu isumannaatsuunngippat § 17, imm. 1 aamma imm. 2 naapertorlugit, tamannalu ilinniartut ineqarfianni najugaqartup ilinniartut ineqarfiisa allaffeqarfiannut ilisimatitsissutiginnereernerani taakku pisariaqanngitsumik kinguarsaanatik naammaginartumik amigaataasunik iluarsiinngippata ilinniartut ineqarfianni najugalik attartornermi akiliutiminik naapertuuttumik appaavigineqarnissaminik piumasaqarsinnaavoq, amigaataasut ajoqutaasulluunniit iluarsineqarnissaasa tungaannut, taamaattorli § 17, imm. 4 takuuk.

§ 21. Ajoqutit iluarsineqarnissaat kinguartinneqarsinnaanngitsut ilinniartut inissiaanni ineqartup ingerlaannartumik ilinniagaqartut ineqarfianni allaffissornikkut aqutsisunut nalunaarutigissavai. Ajoqutit allat ineqartup kinguarsarnagit aamma nalunaarutigissavai.

Imm. 2. Ilinniartut ineqarfianni najugaqartup pissutissaqavinngikkuni ilinniartut ineqarfisa allaffeqarfiata inissiamik misussuiniarpata itigartissinnaanngilai, taakkua:

- 1) inatsisinik unioqutitsilluni atuisoqarnerisooq
- 2) aserfallatsaaliinerup qanoq issusianik paasiniaallutik,
- 3) iluarsaassisoqassatillugu imaluunniit
- 4) allanut attartortitsisoqassatillugu inissiamik misussuiniarpata inissiamut isernissaannik itigartissinnaanngilai.

Imm. 3. Nakkutilliilluni misissuinermi paasineqarpat paarinerluisoqarsimasooq, ilinniartut ineqarfianni najugaqartup kinguarsaanertaqanngitsumik iluarsagassat iluarsassavai, ilinniartut ineqarfisa allaffeqarfiata tamanna piumasarippassuk.

Imm. 4. Ilinniartut ineqarfisa allaffeqarfiat sapaatit akunnerinik 2-nik siumut ilisimatitseeernermigut ilinniartut ineqarfianni najugarineqartumi suliaassanik aallartitsisinnaavoq, suliat ingerlanneqarnissaat najugaqartumut annertuumik akornutaassanngippat. Sulianik allanik aallartitsisoqartinnagu najugaqartoq sapaatit akunnerinik 4-nik siumut ilisimatinneqareertussaavoq. Taamaattorli ilinniartut ineqarfisa allaffeqarfiata tamatigut suliaassanik kinguartinneqarsinnaanngitsunik siumut ilisimatitseqqaarani iluarsaassisinnaavoq.

Imm. 5. Suliat suugaluartulluunniit ilinniartut ineqarfianni allaffissornikkut aqutsisunit aallartinneqartut unitsinneqaratik najugaqartumullu sapinngisamik annertunerpaamik mianerinnilluni suliarineqartassapput. Ilinniartut ineqarfisa allaffeqarfiat ingerlaannartumik suliat malitsigisaannik iluarsaassisassapput.

§ 22. §§-it 17 aamma 18 sanioqqunneqarsinnaanngillat ilinniagaqartut ineqarfianni najugaqartumut ajoqutaasumik.

Kapitali 7

Ilinniartut ineqarfianni najugaqartup ilinniartut ineqarfianni najukkaminik atuinera

§ 23. Ilinniartut ineqarfianni najugaqartup kiisalu inuit attartortumit attartorneqartumut isersinnaatitaasut illumi torersaarnissamut maleruagassat ilinniartut ineqarfiannik allaffissornikkut aqutsisunit aalajangersarneqartut ilinniartut ineqarfiannut atuuttut maleruassavaat, § 6 imm. 2 naapertorlugu.

§ 24. Ilinniartut ineqarfianni najugaqartup ilinniartut ineqarfianni najugarisaq isumannaatsumik paarissavaa, ajoqusikkanullu ilinniartut ineqarfianni najugaqartup nammineq, taassuma inoqutaasa, allalluunniit ilinniartut ineqarfianni najugaqartup isersinnaatitaasa pilersitaannut ajoqusersimasaannullu taarsiinissamut ilinniartut ineqarfianni najugaqartoq akisussaavoq.

§ 25. Nalaatsornikkut ilinniartut ineqarfianni ajutoornerup kingunerisaanik ajoqusiisoqarpat, ilinniartut ineqarfianni allaffissornikkut aqutsisunit eqqiluitsuutinneqartussami isumannaatsuutinneqartussamilu, ingerlaannaq ilinniartut ineqarfianni najugaqartup ilinniartut ineqarfisa allaffeqarfiat nalunaarfigissavaa.

§ 26. Ilinniartut ineqarfianni najugaqartup ilinniartut ineqarfisa allaffeqarfiat akuersitseqqaarnagu ilinniartut ineqarfianni najukkani isumaqatigiissutaasumit allaasumik atussanngilaa, tassunga ilanngullugu:

- 1) ilinniartut ineqarfianni inisimasoqartoqarsinnaanngilaaq, imaluunniit
- 2) ilinniartut ineqarfianni najugaqartup ilinniartut ineqarfianni najukkani allanut atukkiutissanngilaa.

§ 27. Ilinniagaqartut ineqarfianni najugaqartoq:

- 1) Ilinniartut ineqarfianni najugaqartoq ilinniartut ineqarfisa allaffeqarfiat akuersiseqqaartinnagu

ilinniartut ineqarfianni najukkamini allannortitsisinnaanngilaq §§ 28-aamma 29-mi taaneqartunit allaanerusunik inissiinanilu pequsersuisinnaanani.

2) Uumasuteqaqqusaanngilaq.

3) Ilinniartut ineqarfiisa allaffeqarfiat akuersiteqqaarnagu ilinniagaqartunut inissiami aallaasinik eqqussisoqaqqusaanngilaq. Akuerisaasumik aallaasit nassarneqarsimasut ilinniartut ineqarfiisa allaffeqarfianni skaavimmi parnaarsartumi uninngatinneqassapput.

§ 28. Ilinniartut ineqarfianni najugaqartoq ilinniartut ineqarfianni allaffissornikkut aqutsisunut allakkatigut isumaqatigiissuteqareerluni assersuutigalugu telefonimik, internet-imut attaveqaammik il.il. ilinniartut ineqarfianni najukkamini nammineq akilerlugu immikkut ikkussuititsisinnaavoq, taamaattoq immikkoortoq 2 naapertorlugu.

Imm. 2. Ilinniagaqartut ineqarfianni najugartup imm. 1 naapertorlugu pisinnaatitaaffia atuutinngilaq, ilinniartut ineqarfiisa allaffeqarfiata uppersarsarpagu iliniartunut inissiami innaallagissamut atortorissaarutit naammanngitsut atortorissaarusersuinissamut, imaluunniit atortorissaarusersuineq najukkamut najugaqartunulluunniit ajoqutaassasoq.

§ 29. Ilinniartut ineqarfianni najugaqartoq immikkut imaluunniit ataatsimoorussamik ilinniartut ineqarfiisa allaffeqarfiata innersuussinerisigut radiup TV-llu aallakaatitaannik tigooqqaanissamut radiomut fjernsynimulluunniit antenniliisinnatitaavoq, taamaattorli imm. 2 takuuk.

Imm. 2. Ilinniartut ineqarfianni najugaqartup imm. 1 naapertorlugu pisinnaatitaaffia atuutinngilaq ilinniartut ineqarfiisa allaffeqarfiata uppersarsarsimappagu ikkussuineq najugaqartunut ajoqutaassasoq. Pisinnaatitaaffik aammattaaq atuutinngilaq najugaqartoq programminut kissaatigisaminut takunnissinnaappat, ilinniartunut ineqarfimmi ataatsimoorussamik TV-iikkut attaveqaataasut aqutigalugit, imaluunniit ilinniartunut ineqarfimmi ataatsimoorussamik antenit periarfissaasut allat aqutigalugit.

§ 30. Ilinniartut ineqarfianni najugaqartoq ilinniartut ineqarfiisa allaffeqarfiat siumut allakkatigut akuersissuteqarteqqaarlugut inunnik isumaginninnermi inatsisini aalajangersakkat malillugit iluaqusersuutinik, assersuutigalugu kalerrittaatinik, majorallattarfimmik, uffarfimmik igaffimmilluunniit allannortiterinikkut immikkulluunniit ilusilersuinnikkut ikkussuisinnaatitaavoq. Ilinniartut ineqarfiisa allaffeqarfiat ilinniartut ineqarfianni najugaqartup attartukkaminik qimatsinermini inissiap pissusiatut pilerseqqinnissaa aamma kommunalbestyrelsen najukkap pissusaatut pilersitseqqinnermut aningaasartuutit akilerneqarnissaannut qularnaveeqqusiinissaa piumasaqaatigisinnaavaa.

§ 31. Ilinniartut ineqarfianni najugaqartoq ajoqusikkanut ikkussukkamineersunut taarsiinissamut akisussaavoq.

§ 32. Ilinniartut ineqarfianni najugaqartup najukkani qimassinnaanngilaq § 41, imm. 1, nr. 4 naapertorlugu ilinniartut ineqarfiisa allaffeqarfiat isumaqatigiissuteqarfigeqqaartinnagu.

Imm. 2. Imm. 1-mi aalajangersakkamik malinninnginnermi ilinniartut ineqarfianni najugaqartup ineqarnermut akiliutit akiligassarai attartorneq pillugu isumaqatigiissutit eqqortumik ilimasaarinikkut atorunnaarsinneqarnissaata tungaanut, tak. § 36.

Kapitali 8

Atuisinnaatitaanerup allanut tunniunneqarnera

§ 33. Ilinniartut ineqarfiisa allaffeqarfiat pisariaqartutut isigineqarpat ilinniartut ineqarfianni najugaqartoq inissiamut allamut innersuussinnaavaa, assersuutigalugu aserfallatsaaliilluni suliani annertuunik

ingerlatsisoqartillugu, pitsanngorsaataasunilluunniit suliaqartoqartillugu, imaluunniit ilinniagaqartunut inissiami inoqutigii ilaasa nuunnerat pisimappat.

§ 34. Ilinniartut ineqarfianni najugaqartup najukkami allamut attartortissinnaanera pisinnaatitaaffiginngillaa.

Imm. 2. Ilinniartut ineqarfianni najugaqartoq ilinniartut ineqarfisa allaffeqarfiat akuersitissimanagu najukkaminik najugaqartoq alla paarlaasseqatigisinnaanngilaa.

Imm. 3. Ilinniartut ineqarfianni najugaqartoq illoqarfiup ilinniarfigisap avataani sungiusaammik suliaortussaq imaluunniit atuarallartussaq peqannginnerminni ilinniartut ineqarfiini inigisaminnik atugassanngortitsinissamut pisussaaffeqarpoq, peqannginnissaq sivikinnerpaamik qaammatinik marlunnik sivilissuseqarpat. Ilinniartut ineqarfianni ajugaqartoq inigisaminnik ilinniartut ineqarfisa allaffeqarfiannut atugassanngortitsisoq peqannginnermini inigisamut akiliuteqassanngilaa.

§ 35. Ilinniartut ineqarfianni najugaq ilinniartut ineqarfianni najugaqartup aappaanut inooqataanulluunniit imaaliiallaannaq tunniunneqarsinnaanngilaa.

Imm. 2. Imm. 1 naapertorlugu atuisinnaatitaanerup allanut tunniunneqarnera taamaallaat ilinniartut ineqarfisa allaffiannut ilinniartut ineqarfianni inissamik tunineqarnissamik qinnuteqaqqinnikkut pisinnaavoq.

Kapitali 9

Ilinniartut ineqarfianni najugaqartup taamaatitsinera

§ 36. Ilinniartut ineqarfianni najugaqartup attartornini atorunnaarsissinnaavaa sivikinnerpaamik qaammat ataaseq sioqqullugu qaammatip naanissanut allakkatigut ilimasaarereermigut, attartorneq pillugu isumaqatigiissummi sivikinnerusumik piffissaliussilluni ilimasaarisoqarnissamik allassimasoaqanngippat.

Imm. 2. Ilinniartut ineqarfianni najugaqartup attartornermut akiliutissat sinneri akilissavai ilinniartut ineqarfianni najugaqartup najukkani piffissaq isumaqatigiissutaasoq sioqqullugu qimappagu.

Ilimasaarinissamut piffissaliussap qaangiutinnginnerani ilinniartut ineqarfianni najugaqartup najukkani qimappagu ilinniartut ineqarfianni najugarisap piaarnerpaamik attartorneqaqqilernissaa ilinniartut ineqarfisa allaffeqarfiata sulissutigissavaa. Allamut attartortitsinermi ilinniartut ineqarfisa allaffeqarfiata isertitat isertitassaraluiluunniit ilinniartut ineqarfianni najugaqartumut piumasaqaatigisaannit ilanngaatineqassapput.

§ 37. Ilinniartut ineqarfianni najugaq § 20-mi taaneqartutut amigaateqarpat ilinniartullu ineqarfianni allaffeqarfiup tamanna piffissap siviluallaanngitsup ingerlanerani ingerlaannaq iluarsinngippagu iluarsineqarsinnaanngippalluunniit ilinniartut ineqarfianni najugaqartup attartorneq pillugu isumaqatigiissut allakkatigut taamaatitissinnaavaa, amigaat annertuutut isigineqartariaqarpat, ilinniartulluunniit ineqarfiannik allaffissornikkut aqutsisut peqquserlussimappata. Ilinniartut ineqarfianni najugaqartup attartornerminik taamatitsinnginnerani amigaat iluarsineqarpat ilinniartut ineqarfianni najugaqartup kingusinnerusukkut amigaat attartorunnaarnissaminut patsisigisinnaanngilaa.

Ilinniartut ineqarfisa allaffeqarfiata taamaatitsinera

§ 38. Ilinniartut ineqarfisa allaffeqarfiata ilinniartut ineqarfiini najugaqartup attartornera unitsissava, ilinniagaq naammassineqarpat unitsinneqarpalluunniit, taamaattorli imm. 3 takuuk. § 3 naapertorlugu ilinniakkamik ingerlatsinnginneq tamatumunnga atatillugu ilinniakkamik unitsitsinertut isigineqarpoq, taamatullu aamma atuanngiffeqarallarnikkut, aamma erninermut atatillugu

atuanggifteqarnikkut unitsitsigallarneq, ilinniakkamik unititsinertut isigineqarluni, taamaalillunilu ilinniartut ineqarfianni najugaqarsinnaatitaaneq aamma pisuni taakkunani taamatissalluni, takuuk imm. 2. *Imm. 2.* Ilinniakkap, atuarnerrulluunniit naammassineqarnerani, imaluunniit ilinniakkamik unititsinermi ilinniartut ineqarfianni najugaq ilinniarnep taamaatinneraniit unitsinneqarneraniilluunniit kingusinnerpaamik ulluinnat 10 qaangiunneranni qimanneqarsimassaaq, taamaattorli imm. 3 takuuk. *Imm. 3.* Ilinniartut ineqarfianni najugaqartoq ilinniarneminit anisitaappat anisitaanilu pillugu allaffissornikkut oqartussaasunut allanut naammagittaalliorpat, ilinniartut ineqarfianni najugaqartoq anisitsineq pillugu inaarutaasumik aalajangiisoqarnissaata tungaanut najugaqaannarsinnaatitaavoq.

§ 39. Ilinniartut ineqarfiisa allaffeqarfiata ilinniartut ineqarfianni najugaqartoq attartortuuneranit taamaatitsissinnaavaa aatsaat taassuma:

- 1) Ilinniartut ineqarfianni najukkani isumannaatsumik pisimangippagu, tak. § 24.
- 2) § 26-mi aamma § 27-mi aalajangersakkat unioqquaterujussuarsimappagit.
- 3) Naak ilinniartut ineqarfiisa allaffeqarfianniit aallakkatigut mianersoqqussutinik marlunnik tunineqaraluarluni, pissuserisassanik taakkununga ilanngullugit § 23 naapertorlugu torersaarnissamut malittarisassanik malinninngippat, imaluunniit pissusilersornera najugaqartunut allanut akornutaappat, pissutsilli ima ajortiginngippata, assersuutigalugu nakuusertoqarluni aserorterisoqarluniluunniit attartortitsisup attartornermik isumaqatigiisummik atorunnaarsitsinnaanani.

§ 40. Ilinniartut ineqarfiisa allaffeqarfiata § 39 naapertorlugu attartorunnaarsitsinera allakkatigut pissaaq, taakkulu imm. 2 malillugu ilinniartut ineqarfianni najugaqartup akerliusinnaatitaanera pillugu paasissutissartaqassallutik.

Imm. 2. Ilinniartut ineqarfianni najugaqartup attartorunnaarsitsineq akueriumangikkuniuk attartorunnaarsitsinissaq pillugu nalunaarutip tiguneranit sapaatit akunneri marluk qaangiutsinnagit tamanna pillugu maalaaruteqassaaq. Maalaarut aalajangiinermik atorunnaarsitsigallassaaq.

§ 41. Ilinniartut ineqarfiisa allaffeqarfiata attartorneq pillugu isumaqatigiissut atorunnaarsissinnaavaa imatut pisoqartillugu:

- 1) Ineqarnermut akiliinngitsoornermi, takuuk § 15, imm. 1.
- 2) Ilinniartut ineqarfianni najugaqartup najukkani paarinerluppagu, takuuk § 24.
- 3) Ilinniartut ineqarfianni najugaq isumaqatigiissutaasumit allanut atorneqarpat, takuuk § 26.
- 4) Ilinniartut ineqarfianni najugaqartup ilinniartut ineqarfiisa allaffeqarfiat isumaqatigiissute qarfigeqqaarnagu najukkani qimappagu, takuuk § 32.
- 5) Ilinniartut ineqarfianni najukkami akuerineqanngitsumik aallaasinik toqqortaartoqarpat, takuuk § 27, imm. 3.
- 6) Ilinniartut ineqarfianni najugaqartup Ilinniartut ineqarfiisa allaffeqarfianneersut najukkamut isernissaat akerlerippagu, § 21, imm. 1. naapertorlugu pisinnaatitaaffigisatik.
- 7) Torersaarnissamut malittarisassat unioqqutinneqarpata, takuuk § 23.
- 8) Atortut pequtilluunniit attartorneq pillugu isumaqatigiisummik atatillugu ilinniartut ineqarfianni najugaqartumut atugassanngortinneqartut paarinerlunneqarpata. Tamanna aamma atortunut pequtinullu ilinniartut ineqarfiata ataatsimut inini katersuuttarfutaanut atuuppoq.

Imm. 2. Ilinniartut ineqarfiisa allaffeqarfiata attartorneq pillugu isumaqatigiissut taamaallaat atorunnaarsissinnaavaa paarsinerlunneq annertuppat. Inigisamut akiliutissamik akiliisimanginneq annertuujuvoq. Ilinniartut ineqarfiisa allaffeqarfiata attartornermik atorunnaarsitsinnginnerminni ilinniartut ineqarfianni najugaqartoq pissutsinik aqqeeqqullugu allakkatigut peqqoreersimangikkuniuk

attartorneq atorunnaarsisinnaangilaat. Ilinniartut ineqarfiisa allaffeqarfiata attartorneq pillugu isumaqatigiisummik atorunnaarsitsinnginneranni pissutsit imm. 1-imi nr. 1-6-imi taaneqartut aaqinneqarsimappata taakku tunngaviginiarsinnaangilai, attartornermut isumaqatigiisummik atorunnaarsitsinnginnermi.

§ 42. Ilinniartut ineqarfiisa allaffeqarfiata attartortitsineq erngerluni atuutilersussamik atorunnaarsisinnaavaa, ilinniartut ineqarfianni najugaqartup inissiamut, ilinniartut ineqarfiisa allaffeqarfiannut, taakku sulisorisaannut, ilinniartut ineqarfianni najugaqartunut allanut, ilinniartut ineqarfianniissinnaatitaasunullu annertuumik ajoqutaasumik pissusilersorpat, taamatuttaaq:

1) Ilinniartut ineqarfianni najugaqartoq inunnut pineqartunut nakuuserpat imaluunniit persuttaanissamik siorasaarippat.

2) Ilinniartut ineqarfianni najugaqartup pissusilersornera inissiamut imaluunniit inunnut pineqartunut ulorianartorsiortitsinnaappat, matumani ilanngullugit sakkunik atuisimappat imaluunniit ilinniartut ineqarfianni najukkami atortunik ulorianartunik uninngatitaqarpat.

3) Ilinniartut ineqarfianni najugaqartoq ilinniartut ineqarfianni akuutissanik ikiaroorartortalinnik pigisaqartoq atuisorluunniit paasineqarpat, nakorsaatitukkat eqqaassanngikkaanni.

Imm. 2. Attartortitsineq atorunnaarsinneqarsinnaavoq, tamatumani pissusilersornerit imm. 1-imi taaneqartut attartortup inoqutaanit allanilluunnit attartortup attartukkamut isersinnaatitaanit piliarineqarsimappata.

§ 43. Ilinniartut ineqarfiisa allaffeqarfiata attartornermi isumaqatigiissut atorunnaarsippagu, taava najugaqartoq ingerlaannartumik inigisaminit attartukkamit anissaaq, aammalu ineqarnermut allanullu attartornermut atasumik akiligassaminik nalinginnaasumik piffissarititaasut naapertorlugit isumaqatigiisummik atorunnaarsitsisoqarneratut akiliisussaataaassaaq. Ilinniagaqartut ineqarfianni najugaqartup paarsinerlussimanermigut ajoqusikkani annaasallu tamaasa taarsissavai, aamma nuutsitaanermi atasumik aningaasartuutit.

Imm. 2. Ilinniartut ineqarfiisa allaffeqarfiata isumagissavaa ineqarfiup attartorteqqinneqarnissaa. Ilinniartut ineqarfiisa allaffeqarfiata piffissami pineqartumi attartortitsisimagaluarunik isertitarisinnaasaat najugaqarsimasumut piumasaqaataasuni imm. 1.-mi pineqartumit ilanngaatinneqassaaq.

§ 44. §§-ini 38-miit 43-mut malittarisassat ima sanioqqunneqassanngillat ilinniartut ineqarfiisa allaffeqarfiata §§ 38-43-mi taaneqartunit allaanerusunik pissuteqarlutik attartorneq pillugu isumaqatigiisummik atorunnaarsitsisinnaassallutik, imaluunniit taakku ilinniartut ineqarfianni najugaqartumut § 38, imm. 2, aamma § 43-mi aalajangersakkanit annertunerusunik kinguneqartussaasanatik.

§ 45. §§-fit 38-miit 43-mut naapertorlugit attartorneq pillugu isumaqatigiisummik taamaatitsinermut atorunnaarsitsinermulluunniit atatillugu ilinniartut ineqarfiisa allaffeqarfiata ilinniartut ineqarfianni najugaqartup inissaqarteqqinnissaa pisussaafingngilaa.

Imm. 2. Ilinniartut ineqarfiisa allaffeqarfiata §§ 38-43 naapertorlugit attartorneq pillugu isumaqatigiisummik atorunnaarsitsinermut taamaatitsinermulluunniit atatillugu ilinniartut ineqarfianni najugaqartoq paarsinerluttoq ilinniartut ineqarfianni najugaqartup piffissamit ilinniartut ineqarfiannik allaffissornikkut aqutsisunik aqqiagiinngissutiminik qaangiineraniit qaammatit 3 sinnernagit sivilissuseqassaaq.

Kapitali 10

Ilinniartut ineqarfianni najugaqartup inigisaq qimallugu nuunnera

§ 46. Ilinniartut ineqarfianni najugaqartup aninermini ilinniartut ineqarfianni najugaq iserternermisut iluseqartillugu tunniutissavaa.

Imm. 2. Ilinniartut ineqarfianni najugaqartup ilinniartut ineqarfisa allaffeqarfiat akuersitereerlugu iikkat, qilaat, atortut pequtillu ilinniartut ineqarfianni qalipaatinik aalajangersimasumik atorineqartunit allaanerusumik qalipassimappagit qalipaatinik aalajangersimasumik atorineqartut atorlugit qalipaasoqaqqissaq.

Imm. 3. Ilinniartut ineqarfianni najugaqartoq nammeneq qalipaaqqikkumappat, qaqorsaalluni qalipaajumappat tsapiitilersuiumappalluunniit tamanna assassornermik ilinniagaqarsimasutut illersorneqarsinnaasumik pitsaassuseqartillugu suliarineqassaaq. Ilinniartut ineqarfianni najukkap qimanneqarnissaa imaluunniit atorunnaarsitsinissaa naapertorlugu inissiap qimanneqarnissaa inissiap takuniarneqarnissaa sioqqullugu suliaq naammassereersimassaaq, tak. § 47.

Imm. 4. Ilinniartut ineqarfisa allaffeqarfiata nuunnermut atasumik attartortup qularnaveeqqusiissutaa attartornermi isumaqatigiissut naapertorlugu attartortup pisussaaffigisaanik suliaqarnermut assersuutigalugu qalipaannermut, iluarsaannermut eqqiaanermulluunniit atorsinnaavai.

§ 47. Ilinniartut ineqarfianni najugaq qimanneqartussanngorpat ilinniartut ineqarfisa allaffeqarfiata ilinniartullu ineqarfianni najugaqartup najukkamik misissuisoqarnissaa isumaqatigiissutigissavaat. Ilinniartut ineqarfianni najugaqartoq ilaqarluni misissuinermit peqataanissamut pisinnaatitaavoq. Ilinniartut ineqarfianni najugaqartoq aamma ilinniartut ineqarfisa allaffeqarfiat immikkut ilisimasalimmik peqataasoqarnissaanik piumasaqarsinnaapput. Immikkut ilisimasalimmut aningaasartuutaasinnaasut misissuinermit atatillugu immikkut ilisimasalimmit ikiorneqarnissamik kissaateqartumit akilerneqassapput.

Imm. 2. Misissuinissaa pillugu isumaqatigiissuteqarnermut atatillugu ilinniartut ineqarfisa allaffeqarfiata ilinniartut ineqarfianni najukkap misissorneqarnerani peqataannginnerup kingunerisinnaasai ilinniartut ineqarfianni najugaqartumut allakkatigut nalunaarutigissavaat, § 48 naapertorlugu.

Imm. 3. Misissuinermi ilinniartut ineqarfisa allaffeqarfia misissuisimanermut nalunaarusiussaaq, tassanilu amigaataasinnaasut paarinerlutallu ilinniartut ineqarfisa allaffeqarfiata isumaa malillugu ilinniartut ineqarfianni najugaqartup akisussaaffigissasai allassimassapput. Ilinniartut ineqarfianni najugaqartoq taakkununga isumaqataangippat, tamanna ilinniartut ineqarfianni najugaqartup isumai taallugit nalunaarusiami allanneqassapput. Nalunaarusiaq misissuinermit atatillugu susasaqartunit illuatungeriinnit atsiorneqassaaq. Ilinniartut ineqarfianni najugaqartoq taannaluunniit sinnerlugu takkuttooq misissuinermit nalunaarusiap assinganik tunineqassaaq. Tamatuma kingorna pissutissaqanngitsumik kinguarsaanertaqanngitsumik suliassat ilinniartut ineqarfisa allaffeqarfiata isumaa malillugu ilinniartut ineqarfianni najugaqartumit akilerneqartussat qanoq akeqarnissaanik missingersuut allakkatigut ilinniartut ineqarfianni najugaqartumut nassiutissavaat. Taamaakkaluatorli ilinniartut ineqarfianni najugaqartup suliassat amigaataasut nammineeirluni suliarisinnaavaai, tamanna pitsanngorsaaneq pissappat ilinniartut ineqarfianni najugaqartup najugarisaminiit nuunnginnerani, nuunnginnermilu ilinniartut ineqarfisa allaffeqarfia nalileeppinnissamik isumaqatigiissuteqarfigisimaguniuk.

Imm. 4. Ilinniartut ineqarfisa allaffeqarfiata paarsinerluttoqarsimanera aserortisoqarsimaneraluunniit tunngaviginarunigit ininut qimanneqartunut tungatillugu, tamanna ilinniartut ineqarfisa allaffeqarfiata

immikkut uppersarsassavaa, assersuutigalugu assilisat, videoliat uppersarsaasulluunniit atorlugit.

Uppersarsaaneq inunnit ataatsimit amerlanerusunit peqataaffigineqassaaq.

§ 48. Ilinniartut ineqarfianni najugaqartoq taassumaluunniit piginnaatitaa misissuinnermut takkutinngippat, ilinniartut ineqarfiisa allaffeqarfiat pisinnaatitaavoq nalunaarusiaq tunngavigissallugu attartortullu qularnaveeqqusiissutaasa nalinginnaasumik iluarsaassinnermut aningaasartuutissanut, takuuk §§ 46, matussutigineqarnissannut aamma attartornermik isumaqatigiissut naapertorlugu ilinniartut ineqarfianni najugaqartup pisussaaffinut matussutigineqarnissannut atussallugit.

Imm. 2. Ilinniartut ineqarfiisa allaffeqarfiata amigaatit misissuinnerup nalaani pissusissaatut malugineqarsinnaasimagaluit piumasaqaatigisinnaanngilaat, tamatumani ilinniartut ineqarfianni najugaqartoq peqquserlulluni iliuseqarsimanngippat.

Imm. 3. Ilinniartut ineqarfiisa allaffeqarfiat inissiami qimanneqartumi paarsinerluttoqarsimaneranik aserorterisoqarsimaneranilluunniit uparuaasimappat, pissutsit annertussusiilu immikkoortillugit uppersarsaaserneqassapput, assersuutigalugu assilisanik, videolianik uppersarsaasinnaasunilluunniit. Uppersarsaasiineq inuup ataasiinnanngitsup peqataaneratigut pissaaq.

§ 49. Ilinniagaqartut ineqarfianni najugaqartup kingusinnerpaamik nuunnginnermini ullut arfineq pingasut sioqqullugit ilinniartut ineqarfiisa allaffeqarfiat allaganngorlugu nalunaarfignissavaa saaffignissutit adresse-mut sumut ingerlatinneqartassanersut.

Kapitali 11

Maalaarutit

§ 50. Aalajangerit §§-it 39, 41, 42, 45, imm. 2 aamma 48, imm. 1, kiisalu ilinniartut ineqarfiisa allaffeqarfiata aalajangerit paarsinerlussimanermut aserorterisimanermulluunniit tunngasut § 47, imm. 3 aamma § 48 imm. 3, aalajangertoqarneraaniit sap. ak. sisamat qaangiutinnagit allaganngorlugit Suliffeqarnermut Inuussutissarsiutinullu Ilinniartitaanermut Pisortaqaqfimmuut maalaarutigineqarsinnaapput.

Imm. 2. Maalaarutit § 39 naapertorlugu aalajangernermik atorunnaarsitsisapput. Maalaarutit § 41 naapertorlugu aalajangernermik atorunnaarsitsisapput, ilinniartut ineqarfiisa allaffeqarfiannit nalilerneqanngippat, ineqartup ilinniartunut inissiami najugaqaannarnissaa najukkamut, ilinniartut ineqarfiisa allaffeqarfiannut, tassani sulisuusunut, najugaqartunut allanut, allanulluunniit inissiami susassaqaqartunut annertuumik persaqusersuutaassasoq, § 42 naapertorlugu.

Kapitali 12

Atuutilersitsineq

§ 51. Nalunaarut manna 1. december 2007 atuutilerpoq.

Imm. 2. Tassungalu atatillugu atorunnaarsinneqarpoq Kulturimut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup kaajallaasitaa nr. 1/2000 ilinniartut inissiaanni Nuummi najugaqartussanik innersuussisarnermut ataatsimiititaliaq.

Siverth K. Heilmann

/

Isak Nielsen Kleist

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut